

REGIONAL NEWS**HEADLINES:-**

1. Larsap Dr. Hari Babu Kambhampati chu a damloh avangin avangin Hyderadad-damdawiinah enkawl mek a ni.
2. Mahni nunna lak hluar zel laka invenna leh inzirtirna ni, World Suicide Prevention Day chu vawiin khan Mizoramah hman a ni.
3. Union Home Minister Amit Shah-a chuan Cybersecurity telloin ramin hma a sawn thei lo a ti.
4. Vawiin khan Prime Minister Narendra Modia kaihhruaiin Anusandhan National Research Foundation (ANRF) Governing Board chu a vawikhat nan New Delhi ah an thukhawm.

<><><>

GOVERNOR

Larsap Dr. Hari Babu Kambhampati chu khawsik avangin Hyderadad-a Star Hospital panpui a ni a.

Hyderabad-a Star Hospital ah nimin khan dah a ni a, Larsap Dr. Hari Babu Kambhampati hi ni nga chhung a khua a sik avangin phai lam panpui a ni a, Doctor-ten uluk taka an enfiah hnuah result hmasa ah chuan chuap lamah harsatna a nei tih finfiah a ni a, Intensive Care Unit-ah dahluh nghal a ni.

Larsap hi mi thiam rualten an enkawl a, a chanchin hi theih ang anga an hriattir zel tur thu doctor ten an sawi a ni.

<><><>

PM SVANNIDHI AWARD

COVID hripui len hnuia kawngsira dawrte neite tanpuina sorkar laipuiin a duan, PM-SVANidhi Scheme hnuiah Mizoram-ah pung tlem awma loan pek chhuah a ni a,

He scheme hnuia loan hi installmemt chi thum - cheng 10,000, cheng 20,000 leh cheng 50,000 dawn theihna a ni a, he hamthatna mi sang 2 chuangin he hamthatna hi an hawng a ni.

Vawiin khan he scheme hnuia titha te hnenah lawmman hlan a ni a, lawmman hi Performance Recognition for Access to Financial Inclusion and Street Vendors Empowerment (PRAISE) Award tih ni a, UD&PA Minister Pu K Sapdangan lawmman hi semin, Best Performing ULB - Aizawl Municipal Corporation, Best Performing Lending Institutions - Mizoram Rural Bank leh State Bank of India, Best Performing Bank Branches Award-ah Mizoram Rural Branch atangin Champhai Branch, Durtlang, Khatla, Saitual leh Vaivakawn Branch, State Bank of India atangin Aizawl Branch, Dawrpui Branch leh In Touch te hnenah a hlan a ni.

DAY NULM Mission Director Dr. Andrew H. Vanlaldika chuan PM-SVANidhi Scheme chungchang sawifiahin COVID-19 Pandemic laia eizawnna khaihlak, kawngsira dawkai te eizawnna siamsak niin pawisa pung tlem zawka lending institution atanga dawn theihna a ni a. Loan an lakah hian central sorkar chuan zaa 7 pung a rulhsak a ni. Kumin leh nikum India Republic Day hmanna-ah khan PM- SVANidhi beneficiary te chu India khawpui New Delhi-ah hruai an nih thu a sawi.

Vawiin vek hian PM-SVANidhi hnuiaia loan chinchang hre duh tan Loan Camp siam niin Street Vendors loan chungchang inhrilh hriatna hun hman nghal a ni.

<><><>

MINISTERS

Horticulture Minister Professor Lalnilawma chuan, Mizoram sorkarin sawhthing man cheng 50 a bituk tawh thu leh chu chuan kuthnathawk tu te a khai chhuah theih a beisei thu a sawi.

He thu hi vawiina a Bial chhung Tuivawl kam Bualphung zau a 'Maite lo zawh runpui' a hmanpuina-ah sawiin Horticulture Minister chuan Maite khua chu sawhthing china atan a hmun tha tak a nih thu a sawi a, sawrkarin sawhthing chingtute tan theih tawp a chhuah mek zel a ni, a ti. Agriculture Minister Pu PC Vanlalruata pawhin he hun hi hmanpuiin, kuthnathawktute an din chhuah theihna'n sawrkarin nasa takin ngaihtuahna a sen thu leh Thlai chi li- aieng, sawhthing, hmunphiah leh hmarcha-ah te bul tan ni tawhin thlai dangah pawh hmalak tum zel a nih thu a sawi a. Kuthnathawktu te'n phur taka hna an thawh theih nan thlai man bituk sa neih chu a tul tih a sawi bawk.

<><><>

SAICHAL TEACHERS QUARTER

Saichal Development Council-in a Saichal khua a zirtirtu khaw dang atanga lo kal te tana chenna in an sak chu vawiin khan hawn a ni.

Saichal khua a zirtirtu quarter hi Ngopa Sub Divisional Education Officer Dr. Lalhmangaihzuai chuan hawngin, he quarter hi Saichal Development Council chuan an khaw paltlang tur kawngpui laihna a vantlang ram lak hek avanga NHIDCL atanga zangnadawmna an hmuh atanga an sak a ni a, He In sak nan hian sum fai cheng nuai 13 vel sen niin hlawhfa tha 424, mistiri tha 99 sen a nih bakah ni thum hnatlang tha sen a ni bawk.

<><><>

SDC E ROLL PUBLISHED

Sinlung Hills Council inthlan neih tur atana Electoral Roll duan chhin chu vawiin khan Saitual District Election Officer Dr. Lalngura Tlau chuan a tlangzарh.

Dr Lalngura Tlau chuan State Election Commission hnuiaia dan siam chu a danglam hret avangin roll-a thun theih leh theih loh chungchangte pawh inzirtirna neih a tul thu a sawi a, revision neih zawh tak chu MLA inthlanpui hma a Special revision a nih thu sawiin kum 2024 October ni 1 a kum 18 tling tharte thun theih an nih leh nih loh enfiahna a nih thu a sawi bawk.

Saitual Bawrhsap chuan Sinlung Hills inthlan neih tur chu a vawi hniih na tur a nih thu sawiin Political Party, Village Level Officer leh NGO hruaitute hnenah inthlanna thiaghlim leh felfai a awm theih nan thawh ho puiah a sawm a, mipuiten chu an mimal zalenna thiang tak hmanga khawtlang, District, Constituency leh Ram hmasawnna ngaihtuah ran tur leh mimal zalenna hmang thiam turin a chah a, Mizoram State Election Commission ah draft roll tihchhuah dil a nih hnuah vawiinah tlangzарh theih a ni ta chu lawmawm a tih thu a sawi bawk.

He hunah hian Pu Lalthakima, Election Officer chuan Draft Electoral Roll kalphung leh buatsaih a nih dan te a sawifiah bakah, BLO te chu inthlan puala roll a inziahluh tumte pawh hre hmasa ber leh hrechiang bertu an nih dawn avangin roll thianghlim leh thianghlim loh chu an an kut a a inngah thui hle thu a sawi bawk.

Sinlung Hills Council Inthlan tum hnighna kumina neih tur kaltlanga buatsaih Draft Electoral Roll-in a tarlan danin Saitual District chhungah Constituency pali awmin polling station 12 a awm a, vote nei mipa 4071 leh hmeichhia 3953 an vaiin mi 8024 an awm mek a ni

<><><>

WORLD SUICIDE PREVENTION DAY

Mahni nunna lak hluar zel laka invenna leh inzirtirna ni, World Suicide Prevention Day chu vawiin khan Mizoramah hman a ni.

He ni puala Mizorama hun hmania pui ber chu Aizawla Directorate of Health and Medical Education Auditorium-ah neih a ni a, he hun hmanpuitu Health and Family Welfare Joint Secretary Pi Lalnunmawii Ralte chuan thusawiin mahni intih hlum duhna chu Mizoramah a hluar chho mek a ni a ti a, chung ngaihtuahna chu rilru lam natna-in a hrin chhuah a ni tih hriat chian a pawimawh a, mitin ten mahni bula awm, an chenpuite emaw, an thian leh lam hlaa awm pawh ni se, an chetzia leh khawsak phungah danglamna a awm leh awm loh tlithlai ngun a pawimawh a ti. Mahni intih hlum duhna mitin nunah a thlen loh nan rilru suk thlekte a eng zawnga her rema, harsatna tawhte hnehtu ni thei tura intih chhel a ngaih thu a sawi bawk.

He hun hmanpuitu Aizawl SP, Pu Rahul Alwal-a report atanga a lan danin Mizoramah kum 2014 atanga kum 2024 July thla tleng khan mahni intihlum mipa 794 leh hmeichhia 154, an vaiin mi 948 an awm a. Mahni inti hlum te hi kum 20 atanga kum 39 inkar tam berin, mi 584 an ni a. Kum 40 atanga kum 69 inkarin dawt lehin heng kum zingah hian mahni nunna la mi 201 an awm a , kum 1 atanga kum 19 inkarah mani nunna la 117 awmin, kum 60 chung lamah mi 41 an awm bawk.

Kumin bikah hian mahni intihhlumna hi tum 49 a tleng tawh a Zirchianna in a tarlan danin mahni intihhlum zinga zaa 84 chu mipa an ni a, hmeichhia zaa 16 an ni. Mizoramah hian kum 9 atanga kum 90 tlengin mahni intihhlumna hi a tleng ni a chhut a ni bawk.

Mahni intihhlum tum, mi beidawngte lo dawngsawnga, an harsatna leh buaina ngaihthlaksak tura Helpline TeleMANAS chungchang pawh he hunah hian tarlan niin TeleMANAS helpline no 14416 leh 18008914416 hmangin Counsellor leh thawktu dangte englai pawha biak pawh theih an ni a, Tin, anni bakah hian ARDSI Mizoram Helpline 7005983633 leh 9366191341 ah te pawh biak theih reng an ni bawk.

<><><>

INTENSIFIED IEC CAMPAIGN

Tukin khan 'Intensified IEC Campaign - India Fight Against HIV/AIDS & STI' pualin zirlai ten Aizawl khawpui chhungah kawng an zawh a. HIV/AIDS leh mipat hmeichhiatna atanga natna inkawichhawn theih laka fiylim turin leh an nun uluk turin rinawmna thu an tiam a ni. Kawngzawh hi District AIDS Prevention & Control Campaign, Aizawl District buatsaih a ni.

HIV/AIDS leh Sexually Transmitted Infections (STI) tirem tura hmalakna hrang hrang zingah heng thalaite zinga natnain nun a khawihchhiat theih dan leh inkaidarh theih dan te inhrilhhriat a, fimkhur tura inzirtir chu ngaihpawimawh lian tak a ni a. Chumi kal zelah chuan he rally hi buatsaih a ni a. district hrang hrangah neih nin, tukin a Aizawl a rally ah hian hmun hniih - Sikulpuikawn leh chanmari kawn atangin zirlaiten thuзиак kengin kawng an zawk a. Vanapa Hall kawta intawkkhawm in, hun tawp siam a ni.

He Rally ah hian zirna in 40 chuang atangin zirlai thehnem tak an tel a. Ruihhlo ngaite enkawlna institution hrang hrang atangin an tel bawk a ni.

<><><>

I4C

Union Home Minister Amit Shah-a chuan Cybersecurity telloin ramin hma a sawn thei lo a ti. Vawiina Indian Cyber Coordination Centre (I4C) dincham lawmnaah he thu hi sawiin Pu Shah-a chuan cyber security chu ram venhimna atana pawimawh tak anih thu sawiin sawrkar laipui pawhin cyber commando mi sang nga chuang kum nga chhungin a chher dawn a ti a. Heng Cyber Commando te hian Cybercrime chungchangah ram venhim hna an thawk dawn a ni a ti. Union Home Minister chuan Cybercrime avanga harsatna tawk zawng zawngte chu tangruala theihtawp chhuah turin a sawm bawk a ni.

Indian Cyber Crime Coordination Centre hi kum 2018 October thlaa din a ni a. Union Home Ministry hnuaia Cyber and Information Security Division chhungah Central Sector scheme hmanga din a ni.

<><><>

ANRF

Vawiin khan Prime Minister Narendra Modia kaihhruaiin Anusandhan National Research Foundation (ANRF) Governing Board chu a vawikhant nan New Delhi ah an thukhawm. He hunah hian Union Education Minister Dharmendra Pradhan leh official pawimawhte an tel.

ANRF hi National Education Policy 2020 rawtna anga din a ni a. Ramchhung University, College, research institution leh Research and Development laboratory ah te zirbingna leh ngaihtuahna thar tih hmasawn zelna turin ANRF hi din a ni a. Ramchhunga scientific research lama kawng kawhhmuh tur ngaithuahtu sang ber a ni.

<><><>